

Napparsimasunut siunnersortit pillugit Namminersorlutik Oqartussat nalunaarutaat

Tarnimikkut nappaatilinnik nammineersinnaajunnaarsitsineq allatigullu pinngitsaaliisummik iliuuseqarneq pillugu Inatsisartut Inatsisaanni nr. 24-mi, 3. december 2012-imeersumi § 37 naapertorlugu aalajangersarneqarput:

Kapitali 1

Napparsimasunut siunnersortinik atorfnititsineq

§ 1. Tarnimikkut nappaatilinnik nammineersinnaajunnaarsitsineq allatigullu pinngitsaaliisummik iliuuseqarneq pillugu Inatsisartut Inatsisaanni § 33, imm. 1, naapertorlugu, Nunatta Eqqartuussiviani eqqartuussisoq, qinnuteqartut akornanni napparsimasunut siunnersortissanik atorfnititsissaaq.

Imm. 2. Najukkami tusagassiiuutitigut napparsimasunut siunnersortissanik pissarsiortoqassaaq. Ilinniagaqassuseq tunuliaqutaralugu suliat pillugit atuagassiani imal. allani sulisut imm. 3 naapertorlugu napparsimasunut siunnersortissatut piukkunnaatillit akornanni siunnersortissarsiornerup ilisimaneqalernissaanut qulakkeeriviusuni, aamma pissarsiortoqarsinnaavoq.

Imm. 3. Napparsimasunut siunnersortit qinnuteqartut akornanni siunnersortitut suliaasanut immikkut piukkunnaateqarsorisat, ilaatigut peqqinnissaqarfimmut, inunnik isumaginnittoqarfimmut, ilinniartoqarfinnullu attuumassutillit atorfnitsinneqassapput.

Imm. 4. Inuit Dronning Ingridip Napparsimavissuani tarnimikkut nappaatilinnut immikkoortorta qarfimmi atorfillit immikkoortortami uninngasunut siunnersortinngorsinnaanngillat. Dronning Ingridip Napparsimavissuani nalinginnaasumik allaffissornikkullu ingerlatsinermut attuumassutilinnut tamanna aamma atuuppoq.

Imm. 5. Napparsimasunut siunnersortissatut atorfnitsinneqartut amerlassusissaat Nunatta Eqqartuussiviani eqqartuussisumit pisariaqartitsineq tunngavigalugu aalajangerneqassaaq.

§ 2. Nunatta Eqqartuussiviani eqqartuussisup napparsimasunut siunnersortinngortut aqqisa naqinneri siulliit tulleriiarlugit aqqi, najugaat, oqarasuaataasa normui, qarasaasiakkut attaveqarfiat, suliffiat, suliffiannilu oqarasuaatip normua ilanngullugit nalunaarsussavai.

Imm. 2. Eqqartuussisup nalunaarsukkat Dronning Ingridip Napparsimavissuani tarnimikkut nappaatilinnut immikkoortorta qarfimmut nassiutissavai.

Imm. 3. Napparsimasunut siunnersortit najugaasa oqarasuaataasalu normuisa il.il. allannguutaat Dronning Ingridip Napparsimavissuani tarnimikkut nappaatilinnut immikkoortorta qarfimmi nalunaarsugaassapput. Napparsimasunut siunnersortinik nutaanik atorfnititsinermi imal. napparsimasunut siunnersorti § 16, imm. 1 naapertorlugu nalunaarsuivimmit peerneqaqquppat, kiisalu

nappasimasunut siunnersorti § 16, imm. 2 naapertorlugu siunnersortaajunnaarsinneqarpat, Nunatta Eqqartuussiviani eqqartuussisoq nalunaarsuivimmik attavigisassat pillugit paasissutissat allaannguutaat ilanngullugit nutarterissaaq, imm. 2-milu periaaseq naapertorlugu nassiussissalluni.

Kapitali 2

Napparsimasunut siunnersortinngortitsineq

§ 3. Napparsimasut pinngitsaaliisummik napparsimmavimmut unitsinneqartut, pinngitsaaliisummik tigummigallarneqartut imal. pinngitsaaliisummik katsorsarneqartut, napparsimmavimmiit angerlareernermi pinngitsaaliisummik malittarineqartut, pinngitsaaliisummik aalaakkerneqartut, nukersorfigineqartut, napparsimasorlu illersorniarlugu pinngitsaaliisummik aalaakkerneqartut, immikkut nakkutigineqartut ataannartumik nal. ak. 24-t sinnerlugit sivilsussuillit, kiisalu inatsimmi § 26, imm. 1, nr. 2 naapertorlugu immikkoortortami matunik parnaarsinermi eqqugaasut tamarmik siunnersorteqartinneqassapput.

§ 4. Inatsisartut i natsisaanni § 1, imm. 2 naapertorlugu pinngitsaaliisummik napparsimmavimmut unitsitsinermi, peqqinnissaqarfiup qitiusumik immikkoortortaani peqqissaavimmiluunniit pinngitsaaliisummik unitsitsineq ilanngullugu, pinngitsaaliisummillu tigummigallagassanngortitsinermi nammineersinnaajunnaarsitsinermit atatillugu siunnersorteqartitsisoqassaaq. Napparsimasoq napparsimmavimmut peqqissaavimmulluunniit piniariarpat, pinngitsaaliisummik tigummigallarneqarpat, pinngitsaaliisummik iliuuseqartoqarpat, napparsimasorlu piumassuserinngisaminik tigummineqarpat, siunnersorteqartitsisoqassaaq.

Imm. 2. Pinngitsaaliisummik iliuuseqarnerni allani pinngitsaaliisummik iliuuseqarnissaq aalajangiunneqarpat, siunnersortinngortitsisoqassaaq.

§ 5. Dronning Ingridip Napparsimmavissuani tarnimikkut nappaatilinnut immikkoortortaqarfimmi peqqissaasup pigaartuusup, pisuni ataasiakkaani piaarnerpaamik pinngitsaaliisummik iliuuseqarfignittoqarneranik ilisimatitsineragut, siunnersortip tulluuttup siunnersortinngorneranik ilisimatinneratigut siunnersortinngortitsisoqassaaq. Napparsimasoq siusinnerusukkut uninnganermini siunnersorteqartinneqarsimappat, nalinginnaasumik siunnersortaasimasoq taanna siunnersortinngortinneqassaaq. Inatsisartut inatsisaanni § 1, imm. 2 naapertorlugu pinngitsaaliisummik unitsitsinermi, napparsimasup uninngavigigallagaata, piaarnerpaamik Dronning Ingridip Napparsimmavissuani tarnimikkut nappaatilinnut immikkoortortaqarfik, napparsimasumut siunnersortinngortitsisoqarsinnaaqqullugu, unitsitsineq pillugu ilisimatissavaa.

Imm. 2. Siunnersortinngortitsinnginnermi siunnersortinngortitsiniarnerup oqaaseqarfignissaanut, napparsimasoq periarfissinneqassaaq.

Imm. 3. Napparsimasup nalunaarsuiffimmiittumik allamik siunnersorteqartinneqarnissani kissaatigippagu, Dronning Ingridip Napparsimmavissuani tarnimikkut nappaatilinnut immikkoortortaqarfimmi, sapinngisaa tamaat kissaatigineqartoq eqquutsinniarneqassaaq. Aalajangiineq kredsdommerimut allaffissornikkut aalaajangiisuussumut naammagittaalliutigineqarsinnaavoq.

Imm. 4. Napparsimasup nalunaarsuiffimmiinngitsumik siunnersorteqarnissani kissaatigippagu, siunnersortissatut tullinnguuttoq siunnersortinngortinneqarallassaaq, napparsimasup siunnersortissatut nammineq toqqagaata siunnersortinngortinneqarsinnaanissaa kredsdommerip aalajangiivigissavaa. Napparsimasup siunnersortissamisut kissaatigisaa piumassuseqarpat, napparsimasumullu siunnersortissatut piukkunnaateqarpat, napparsimasup kissaataa eqquutsinneqassaaq.

§ 6. Napparsimasup ersarissumik kissaatigalugu oqaatiginngippagu, napparsimasunut siunnersortip pineqartup suliaa assigisaaluunniit, assersuutigalugu napparsimasumut pineqartumut kommunimi sullissisuunikkut, pineqartup napparsimasup soqutigisaasa pissusissamisoortumik isumaginissaannut piukkunnassusaanik nalornilersitsisumik pisoqarpat, napparsimasunut siunnersortissanut nalunaarsuiffimmi nalunaarsimasumik siunnersortinngortitsisoqarsinnaanngilaq.

§ 7. Nalinginnaasumik oqarasuaatikkut siunnersortinngortitsisoqartassaaq, tamatumali kingorna allaganngorlugu uppersarsarneqassalluni. Dronning Ingridip Napparsimmavissuani tarnimikkut nappaatilinnut immikkoortortaarfimmi peqqissaasoq pigaartuusoq napparsimasunut siunnersorti, assersuutigalugu aallarsimaneq, napparsimaneq assigisaalluunniit pissutigiginagit pisinnaaneranik qulakkeerisuussaaq.

Imm. 2. Napparsimasunut siunnersorti napparsimasumut allanut siunnersortinngortinneqareernini pissutigalugu siunnersortinngortinneqarniarnermut naaggaarsinnaavoq.

§ 8. Napparsimasumut siunnersortissanngortinneqareersup nalunaarsuiffimmiittumik allamik taarserneqarnissaa napparsimasup piumasarippagu, tamannalu tunngavissaqartutut nalilerneqarpat, Dronning Ingridip Napparsimmavissuani tarnimikkut nappaatilinnut immikkoortortaarfimmi akuerineqassaaq. Immikkoortortaq piumasaqaammut tamatumunnga itigartitsippat, tamanna Kredsdommerimut naammagittaalliutigineqarsinnaavoq.

Imm. 2. Siunnersortissanngortinneqareersoq allamik siunnersortinngortut nalunaarsuiffianniinngitsumik taarserneqarnissaa napparsimasup piumasarippagu, napparsimasoq siunnersortaasorlu akerleriilersimappata, napparsimasup kissaatigisaa naapertorlugu siunnersortinngortinniagaaq piumassusilittut nalilerneqarsinnaappat, napparsimasumullu siunnersortitut piukkunnaateqarpat, aatsaat akuerineqarsinnaavoq. Kredsdommeri aalajangiisuussaaq.

Kapitali 3

Napparsimasunut siunnersortip suliassai pisinnaatitaaffilu

§ 9. Napparsimasunut siunnersorti sapinngisaa tamaat napparsimasoq isumasioqatigalugu iliuuseqartassaaq.

§ 10. Tarnimikkut nappaatilinnik sullissinermi nammieersinnaajunnaarsitsineq allatigullu pinngitsaaliissummik iliuuseqarneq pillugu Inatsisartut Inatsisaanni § 32, imm. 2 naapertorlugu suliassat suliarineranni, napparsimasunut siunnersorti ilaatigut pinngitsaaliissutip siunnersuisoqartitsinermut patsisaasup pisariaqanngitsumik sivitsorneqannginnissaanut nakkutilliisuussaaq.

§ 11. Napparsimasup aningaasaqarnikkut inissisimanera pissutsillu allat inuttaanut namminermut tunngasut tarnimikkut nappaatilinnut immikkoortortami uninnganermut, katsorsartinneqarullu attuumassuteqanngitsut, napparsimasunut siunnersortip suliassaasa avataanniipput.

§ 12. Napparsimasumut siunnersortinngortup napparsimasoq piaarnerpaamik pulaassavaa attaviguassallugulu. Napparsimasoq Dronning Ingridip Napparsimmavissuaniippat, siunnersortinngornerup kingorna nal. ak. 24-t qaangiutsinnagit napparsimasoq siullermik pulaarneqassaaq. Napparsimasoq sinerissami peqqinnissaqarfiup immikkoortuisa arlaanniikkallarpat, siunnersortinngornermiit nal. ak. 24-t qaangiutsinnagit oqarasuaatikkut attavigineqassaaq. Tamatuma kingorna sapinngisamik sapaatip akunneranut ataasiarluni pisariaqartitsinerlu naapertorlugu pulaarneqartassaaq.

Imm. 2. Napparsimasut uninngareernerup kingorna pinngitsaaliissummik malittarineqartussat,

napparsimasoq angerlartinnagu pulaarneqassapput. Angerlareernermi attaveqatigiinneq aatsaat napparsimasup kissaatigippagu, taamaallaallu peqqinnissaqarfiup qarasaasiakkut attaveqaataasa atornerisigut pisassaaq. Napparsimasoq Nuummiippat, oqarasuaatikkut nalunaarasuartaatillu allat atorlugit attaveqatigiinnissaq napparsimasup kissaatigippagu, Dronning Ingridip Napparsimmavissuanut pulaarnermik taarserneqarsinnaavoq.

Imm. 3. Napparsimasup kissaataa naapertorlugu napparsimasunut siunnersortip pulaarnissaanik oqarasuaatikkulluunniit attaveqarnissamik qulakkeerinissaq, katsorsartiffimmi nakorsap akisussaaffigaa.

Imm. 4. Akeqanngitsumik akornuserneqaranilu nammineq takkunnikkut, allakkatigut oqarasuaatikkullu napparsimasup uninnganerani attaveqarsinnaaneq, napparsimasunut siunnersortip pisinnaatitaaffigaa.

§ 13. Ilisimasariaqagaq sunaluunniit suliassap illersorneqarsinnaasumik naammassineqarsinnaanissaanut pisariaqartoq, immikkoortortami sulisut napparsimasup siunnersortaanut ilisimatitsissutigissavaat. Nakorsamit napparsimasumut ilisimatitsissutaanngitsut taamatuttaaq napparsimasup siunnersortaanut ilisimatitsissutaassanngillat.

Imm. 2. Napparsimasunut siunnersorti pinngitsaaliisummik iliuuseqarnernik nalunaarsuiffimmi, napparsimasumut siunnersortaaffissamut tunngasunik paasiniaanissamut pisinnaatitaavoq.

Imm. 3. Napparsimasut inatsisitigut inissisimanerat pillugu Inatsisartut peqqussutaat nr. 6, 31. maj 2001-imeersoq naapertorlugu, napparsimasup nammineq pisinnaatitaaffigippagu, napparsimasorlu akuersippat, napparsimasumut siunnersorti napparsimasoq pillugu napparsimmaviup allattugaataasa imaanik paasiniaanissamut pisinnaatitaavortaaq.

§ 14. Napparsimasumut siunnersorti nipangiussisussaataavoq.

Kapitali 4

Siunnersortaajunnaarneq il.il.

§ 15. Siunnersortaaneq pinngitsaaliisummik iliuuseqarnerup taamaatinneqarnera ilutigalugu atorunnaarsinneqassaaq. Napparsimasunut siunnersorti pinngitsaaliisummik taamaatitsineq pillugu Dronning Ingridip Napparsimmavissuani tarnimikkut nappaatilinnut immikkoortorta qarfiimmi peqqissaasumit pigaartuusumit nalunaarfigineqassaaq. Pinngitsaaliisummik iliuuseqarneq sivikitsoq napparsimasumullu siunnersorti suli pulaanngitsoq taamaatinneqarpat, siunnersortaaneq nalunaarasuartaatikkut attaveqareernermi imaluunniit pulaareernermi aatsaat atorunnaassaaq.

Imm. 2. Imm. 1-imi aalajangersagaq apeqqutaatinnagu napparsimasup maalaarutaanut aallartinneqareersumut imaluunniit pinngitsaaliisummik iliuuseqarnerup taamaatinneqarnerani aallartinneqartumut napparsimasumut siunnersorti ikiutissaaq.

Imm. 3. Siunnersortinngortinneqartoq § 8 naapertorlugu allamik taarserneqarpat, siunnersortaaneq taamaatinneqassaartaaq.

§ 16. Napparsimasunut siunnersorti sukkulluunniit siunnersortinik nalunaarsuiffimmit peerneqaqqusinnaavoq. Nalunaarsuiffimmit peerneqaqqulluni kissaateqarneq Dronning Ingridip Napparsimmavissuani tarnimikkut nappaatilinnut immikkoortorta qarfiimmut, Nunatta Eqqartuussiviani eqqartuussisumut tamatuminnga ilisimatitsisussamut, nalunaarutigineqassaaq.

Imm. 2. Napparsimasunut siunnersorti siunnersortit nalunaarsorsimaffianniittoq siunnersortitut pisussaaffimminik annertuumik sumiginnaappat, imaluunniit siunnersortaanissamut piukkunnaateqanngitsoq paasineqarpat, siunnersortaajunnaarsinneqassaaq.

Siunnersortaajunnaarsitsinermi pineqartoq nalunaarsuiffimmit peerneqassaaq. Napparsimasunut

siunnersortit pisussaaffimminnik sakkortuumik sumiginnaasut Dronning Ingridip Napparsimmavissuani tarnimikkut nappaatilinnut immikkoortorta qarfimmu saaffiginnissutaassapput. Immikkoortortap suliaq piareersaareerlugu tusarniaassutigereerlugulu Nunatta Eqqartuussiviani eqqartuussisumut tunniutissavaa.

Imm. 3. Imm. 2 naapertorlugu napparsimasunut siunnersortaajunnaarnissaq Nunatta Eqqartuussiviani eqqartuussisumit aalajangiivigineqassaaq. Eqqartuussiviup aalajangiinera Dronning Ingridip Napparsimmavissuani tarnimikkut nappaatilinnut immikkoortortap napparsimasunut siunnersortimut ilisimatitsissutigissavaa.

Imm. 4. Imm. 1 imaluunniit imm. 2 naapertorlugu siunnersortitut nalunaarsuiffimmit peerneqarneq siunnersortinngortinneqaaqqissinnaannginnermik kinguneqassaaq. Imm. 2 naapertorlugu nalunaarsuiffimmit peerneqarneq maannamut siunnersortaaffiit taamaatinneqarnerannik kinguneqassaataaq.

Imm. 5. Napparsimasunut siunnersortit nalunaarsuiffimmi nalunaarsorneqarsimanngitsut, imm. 2-mi piumasaqaatit naapertorlugit siunnersortaajunnaarsinneqarsinnaapput. Taamaattoqarnissaa Nunatta Eqqartuussiviani eqqartuussisumit imm. 2-mi periusaasoq naapertorlugu aalajangiivigineqassaaq.

Kapitali 5

Akissarsiat

§ 17. Peqqissutsimut Attaveqarnermullu Naalakkersuisoqarfik napparsimasunut siunnersortinngortinneqartunut, napparsimasunut siunnersortit nalunaarsorsimaffianniittunut, napparsimasup pinngitsaaliissummik iliuuseqarfingineqarnerata qanoq sivisutiginera apeqqutaatillugu, akigititat uku naapertorlugit akissarsiaqartitsisuussaaq:

- 1) Pinngitsaaliinikkut iliuuseqarnerit ullut arfineq marluk angullugit sivisussusillit: 754 kr.
- 2) Pinngitsaaliinikkut iliuuseqarnerit ullut arfineq pingasuniit 30-t angullugit sivisussusillit: 1.131 kr.
- 3) Pinngitsaaliinikkut iliuuseqarnerit ullut 30-t sinnerlugit sivisussusillit: 1.508 kr. qaammatit pingajussaat aallartikkaangat.

Imm. 2. § 5, imm. 1, oqaaseqatigiit aappaat naapertorlugu arlaleriarluni napparsimasumut ataatsimut sivikitsumik siunnersortinngortitaanermi, siullermik siunnersortinngortinneqarnermiit siunnersortinngortinneqaaqqinnerni tulluittuni immikkut ittuni, siunnersortinngortinneqarnerni ataasiakkaani akissarsiat 377 koruuninut apparneqarsinnaapput.

§ 18. Aningaasat § 17, imm. 1-imi 2-milu taaneqartut napparsimasumut siunnersortaanermi pulaartarnermut, maalaarutinik ikiuinnermut assigisaannullu aningaasartuutit saniatigut, siunnersortaanermi aningaasartuutinut, ilaatigut oqarasuaammik atuinnermut assigisaanullu matussutaassapput.

Imm. 2. Immikkorluinnaq ittumik pisoqartillugu Peqqissutsimut Attaveqarnermullu Naalakkersuisoqarfiup suliaq qanoq annertutiginera apeqqutaatillugu § 17, imm. 1-imi taaneqartut amerlillugilluunniit ikilisinnaava.

Kapitali 6

Atuutilersitsineq

§ 19. Nalunaarut atuutilersinneqarpoq 16. december 2013.

Namminersorlutik Oqartussat, ulloq 2. december 2013

Steen Lynge

/

Ann Birkekær Kjeldsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut